



Custs en proceduras civilas

Tenor l'[art. 95 al. 1 CPC](#) sa cumponan ils custs da process dals custs da dretgira e da l'indemnisaziun da la partida.

Custs da dretgira

Tar ils custs da dretgira tutgan:

- las pauschalas per la procedura da mediaziun;
- las pauschalas per la decisiun (taxa da decisiun);
- ils custs per la retschertga da las cumprovas;
- ils custs per la translaziun ed
- ils custs per la represchentanza da l'uffant tenor ils art. 299 e 300 CPC.

En la [OTDPC](#) (Ordinaziun davart las taxas da dretgira en proceduras civilas, DG 320.210) ha la Dretgira chantunala dal Grischun fixà las pauschalas correspondentas.

La dretgira po pretender da la partida accusanta in pajament anticipà fin a l'autozza dals custs da dretgira presuntivs. Ella fixescha in termin per far il pajament. Sch'il pajament anticipà na vegn er betg fatg entaifer in termin prolungà, n'entra la dretgira betg en il plant u en la dumonda.

Indemnisaziun da la partida

Sco indemnisaziun da la partida vala:

- l'indemnisaziun da las expensas necessarias,
- ils custs d'ina represchentanza professiunala (per regla advocata/advocat) ed
- en cas motivads: ina indemnisaziun adequata per malcumadaivladads, sch'ina partida n'ha betg gi ina represchentanza professiunala.

Quai è en emprima lingia ils custs per la represchentanza legala che sa cumponan da l'onurari da l'advocata/l'advocat sco er da las expensas en daner blut per ils custs da viadi, per taxas postalas, per servetschs da telecommunicaziun, per copias e per chaussas sumegliant. Cuntrari ad auters chantuns n'enconuscha il chantun Grischun nagina tariffa chantunala per advocatas/advocats.

Repartiziun dals custs

Ils custs da process totals vegnan fixads d'uffizi e da princip en la decisiun finala. Els vegnan adossads a la partida perdenta. En cas che la dretgira n'entra betg en il plant u en cas d'ina retratga dal plant vala la partida accusanta sco partida perdenta. Sch'il plant vegn reconuschì, percuenter la partida accusada. Sche ni l'ina ni l'autra partida n'ha gudagnà cumpletmain, vegnan ils custs da process repartids proporziunalmain suenter il resultat da la procedura. Custs da process nunnecessaris sto quel pajar che als ha chaschunà, e quai independentmain dal resultat da la procedura.

Regulaziun da custs spezial

En la procedura da mediaziun na vegnan concedidas naginas indemnisaziuns da partidas. En tsherts champs giuridic na resultan ultra da quai nagins custs da dretgira. Resalvada resta mintgamai l'imposiziun dals custs da dretgira en cas da process fatgs en mala fai u aposta.